

1 TIMOTI

¹ E Pol. Kristus Yesus na e qariñbej deqa e aqa anjam mare mare laqnum. Kristus Yesus aqa Abu Qotei wo nañgi aiyel na e wau di ebeb. Qotei na iga eleñej deqa iga Yesus a olo lañ qureq na bam unqajqa deqa tariñqoqnsim unum.

² O Timoti, e anjam endi neñgrenyosim inoq qariñyonum. E nami Yesus aqa anjam bole ni mermonam qusimqa ino areqaloq di singilatem. Deqa ni ijo añgro bole bulonum. Gago Abu Qotei wo gago Tamo Koba Kristus Yesus wo nañgi aiyel ni qa dulosib are boleinjrimqa ni lawo na soqnime.

Iga gisanj anjam kalil gotranyoqñqom

³ E Masedonia sawaq gilqa osimqa ni endegsi mermem, “Ni Efesus qureq di soqne.” Ariya bini e anjam di pulutosiy ni mermqai, “Ni Efesus qureq di olo soqne.” O Timoti, qure dia tamo qudei nañgi Qotei aqa anjam marqa oqnsib gisanj anjam bei ti turtoqnsib tamo uñgasari nañgi minjreqnub. Deqa ni Efesus qureq di sosimqa tamo nañgi di siñgila na endegsi minjroqne, “Ninji gisanj anjam di plattoqnaib.” ⁴ O Timoti, gisanj tamo nañgi di laja sa anjam ti nañgo moma nañgo ñam qa ti anjam koba laja laja marelenjeqnub. Deqa ni na tamo nañgi di minjrimqa nañgo kumbra di uratqab. Nañgo anjam dena tamo uñgasari nañgo areqalo tulanj ugeugeiyetnjreqnu. Deqa tamo uñgasari nañgi di Qotei qa nañgo areqalo siñgilatqa yeqnab gisanj tamo nañgo anjam dena nañgi getentnjreqnu. Deqa inđi bole bole Qotei na iga egeqnu qaji

di naŋgi qalieqa keresai. ⁵ Gago wau agiende. Iga na tamo ungasari naŋgi Yesus aqa anjam min-jreqnam naŋgi a qa naŋgo areqalo siŋgilatoqnsib endegsi poinjreqnu, “Bole, iga Qotei aqa ɻamgalaq di une saiqoji unum.” Degsi poinjreqnaqa naŋgi are bole ti sosib qalaqalaiyo kumbra dauryeqnub. ⁶ O Timoti, tamo qudei naŋgi kumbra di urateqnub deqa naŋgi tulan nanarioqnsibqa anjam laŋa laŋa marelenjeqnub. ⁷ Bole, naŋgi Qotei aqa dal anjam plaltqajqa arearetnjreqnaqa mareqnub, “Anjam iga plalteqnum qaji endi anjam bole.” Ariya anjam naŋgi plalteqnub qaji di aqa utru naŋgi segi poinjrosaieqnub.

⁸ Iga qalieonum, Qotei aqa dal anjam a bolequja. Ariya iga dal anjam geregere daurqasai di dal anjam dena iga aqaryaigwa keresai. ⁹ Ni que. Qotei a tamo bole naŋgi qa osiq dal anjam atosai. A dal anjam gotraŋyo qaji tamo naŋgi qa osiq dal anjam atej. Naŋgo kumbra uge agiende. Naŋgi diqoqnsib Qotei qoreiyoqnsib une ateqnub. Osib Qotei aqa kumbra dauryqa uratoqnsib olo mandam qaji kumbra uge uge yeqnub. Naŋgi naŋgo ai abu ñumsib moiyotnjreqnub. Osib tamo qudei naŋgi dego ñumelenjeqnub. ¹⁰ Naŋgi sambala kumbra yoqnsib laqnub. Naŋgi uŋa wo ɻerenqqa uratoqnsib tamo bei bei wo ɻerenqnsib sambala kumbra yeqnub. Naŋgi tamo qudei bajinjeñoqnsib naŋgi kanŋgal tamo ateqnub. Naŋgi gisan anjam koba maroqnsib olo puluoqnsib naŋgo gisan anjam di siŋgilateqnub. Osib kumbra uge uge gargekoba yeqnub. Naŋgo kumbra de ti Qotei aqa anjam bole ti ombla jeu atoqnsib unub. ¹¹ Qotei na e qarinbej

deqa e aqa anjam bole di mare mare laqnum. Anjam di rian koba ti unu. Iga areboleboleigwajqa utru agi Qotei a segi.

Qotei a Pol qa dulej

¹² Gago Tamo Koba Kristus Yesus a na e singila ebsiqa marej, “Pol a ijo wau tamo bole sqas. A ijo wau uratqasai.” Osiqa e giltbosiqa aqa wau ijo banq di atej. Deqa e a tulan binjiyeqnum. ¹³ Bole, nami e Yesus aqa ñam misilinþyoqnsim a jeutoqnsim a qa anjam uge uge maroqnem. E nanari tamo sosim ijo areqalo Yesus qa singilatqa uratoqnem deqa e kumbra uge di yoqnem. Yeqnam bati di Qotei a e qa dulej. ¹⁴ Osiqa a e qa are tulan boleiyosiq ijo are tigeltebjeq deqa bini e gago Tamo Koba Kristus Yesus qa ijo areqalo siŋgilatoqnsim qalaqlaiyo kumbra dauryeqnum.

¹⁵ Anjam bei agiende. Kristus Yesus a une tamo naŋgi elenqa osiq deqa mandamq aiyej. Tamo kalil naŋgi anjam di quſib marqab, “Bole.” O Timoti, e nami une gargekoba yoqnem deqa e une tamo kalil naŋgi tulan buŋnjroqnem. ¹⁶ Yesus Kristus a une tamo naŋgi qa tarinþokobaiyeqnu. Aqa kumbra di tamo uŋgasari kalil naŋgi qaliejajqa deqa a matiq e qa dulej. Di kiyaqa? Naŋgi Yesus aqa kumbra di qalieosib a qa naŋgo areqalo siŋgilatosib ñambile gaigai sqajqa deqa. ¹⁷ Qotei a bati gaigai gago Mandor Koba sqas. A moiqa keresai. Iga a unqa keresai dego. A segi Qotei bole. Deqa iga aqa ñam soqtoqnsim a binjyoqnnom. Bole.

Pol a Timoti minjej, “Ni qoto tamo bulosim kumbra uge kalil gotraŋyoqne”

18 O ijo aŋgro Timoti, Kristen gate naŋgi nami Qotei aqa medabu osib ni qa anjam babtosib wau emeb. E deqa are qalsimqa anjam endi inoq qarinjyonum. Deqa ni sisiyosim daurye. Kristen gate naŋgo anjam babteb qaji dena ni singilatmoqnimqa ni qoto tamo bulosim kumbra uge kalil gotranjyoqne. **19** Gotranjyoqnsimqa ino are-qalo Yesus qa bole singilatoqne. Osim qalieqam, ni Qotei aqa ŋamgalaq di une saiqoji unum. O Timoti, tamo qudei naŋgi naŋgo uneq di tulan sougetejunub deqa naŋgi Yesus aqa anjam bole qalieqa keresai. Qotei na naŋgo kumbra tingitennjrqa yeqnaq naŋgi olo urateqnub. Naŋgi Yesus qa naŋgo areqalo singilatqa asginjreqnaqa qobuŋ a sargumq di paraeqnu dego kere naŋgi areqalo uge uge dauryoqnsib laqnub. Kumbra dena naŋgi tulan ugetnjrzas. **20** Agi Himeneus Aleksander wo naŋgi aiyel kumbra uge deqaji yeqnub. Deqa e na naŋgi aiyel Satan aqa banq di atem. Di kiyaqa? Naŋgi aiyel endegsi poinjrqajqa, “Bole, iga olo Qotei misiliŋyqasai.”

2

Iga tamo uŋgasari kalil naŋgi qa pailyoqnsom

1 O Timoti, e anjam kobaquja bei endegsi mermit ni qusim daurye. Ni na Kristen naŋgi minjroqnimqa naŋgi tamo uŋgasari kalil qa pailyoqnsib Qotei binjyoqnebe. **2** Osib mandor kokba ti sawa taqato qaji tamo kalil naŋgi qa ti dego Qotei pailyoqnebe. Yim naŋgi na iga geregere taqatgesoqniqbqa iga kalil lawo na sosim kumbra Qotei a areareteqnu qaji di dauryoqnsom. **3** Pailyo deqaji

Qotei aqa ɳamgalaq di tulaŋ boledamu. Qotei agi iga eleñej qaji. ⁴ Qotei aqa are koba endegsi unu. A na tamo uŋgasari kalil naŋgi eleñjamqa naŋgi aqa anjam bole poinjrim ojesqab. ⁵ Iga qalie, Qotei a segi qujai Qotei bole. Kristus Yesus a segi qujai iga Qotei ti gago ambleq di tigelesosiqa yeba waiyej unu. ⁶ Yesus a moiqajqa bati kereonaqa a bosiqa tamo uŋgasari kalil naŋgi eleñqa marsiqa aqa segi ɳambile uratosiq moiyej. Aqa kumbra dena Qotei na iga endegsi osorgej, a na tamo uŋgasari kalil naŋgi eleñqajqa are koba unu. ⁷ Qotei na e giltbej deqa e aqa anjam mare mare laqnum. E aqa anjam palontqajqa wau ti. E bole mermonum. E gisanjosai. E aqa anjam plaltoqnitqa sawa bei bei qaji naŋgi poinjrim Yesus qa naŋgo areqalo singilatqajqa deqa osiq e wau ebej.

⁸ Deqa ni na Kristen tamo qure qure kalilq di unub qaji naŋgi minjroqnimqa naŋgi minjinj ti njirinj ti uratosib Qotei aqa segi kumbra boleq di sosib naŋgo banj soqtoqnsib pailyoqnebe.

*Uŋgasari naŋgi Qotei aqa anjam dauryosib
wau bole bole yoqnqab di naŋgo wala bole*

⁹ Ni na Kristen uŋgasari naŋgi minjroqnimqa naŋgi areqalo bole na gara jigoqnebe. Naŋgi diqoqnsib naŋgo gate banja walatoqnaib. Osib kolilei na ti wala bole na ti naŋgo jejamu maqtosib gara wala ti jigoqnaib. ¹⁰ Ni na uŋgasari naŋgi minjroqnimqa naŋgi Qotei aqa anjam dauryoqnsib wau bole bole yoqnebe. Di naŋgo wala bole. ¹¹ Uŋgasari naŋgi naŋgo segi ñam aguq atoqnsib medabu getentoqnsib Qotei aqa anjam quoqnebe. ¹² Naŋgi Qotei aqa anjam plaltaib. Osib tamo naŋgo gate

saib. E na naŋgi saidnjronum. Naŋgi med-abu getentosib anjam segi quoqnebe. ¹³ Ni que. Qotei a Adam namoqna gereiyosiqa bunuqna a Iv gereiyej. ¹⁴ Satan na Adam gisan anjam minjosai. A na Iv gisan anjam minjnaq quſiq dauryej. Osiq deqa a une atej. ¹⁵ Deqa ni na uŋgasari naŋgi minjroqnimqa naŋgi aŋgrotoqnsib aŋgro qa waquoqnebe. Naŋgi wau di yoqnsib gaigai Yesus qa naŋgo areqalo singilatoqnebe. Osib qalaqlaiyo kumbra dauryosib Qotei aqa segi kumbra boleq di sosib naŋgo segi jejamu taqatoqnebe. Yim deqa Qotei na naŋgi elenqas.

3

Tamo bei a Kristen naŋgo gate sqa marsimqa a kumbra bole bole dauryoqnem

¹ O Timoti, ijo anjam endi bole. Deqa ni que. Tamo bei a Kristen naŋgo gate sqajqa are qalqas di kere. Di wau bolequja. ² Deqa ni unime. Tamo bei a Kristen naŋgo gate sqa marsimqa a kumbra bole bole dauryoqnem. Yim tamo uŋgasari naŋgi aqa jejamuq di une bei unqasai. Tamo di a uŋga aiyeltaiq. A uŋga qujai segi esoqnem. Osim aqa segi so geregere taqatosim areqalo bole ti soqnem. Tamo laŋaj naŋgi aqa meq boqnibqa oqnsim geregereinjroqnem. A Qotei aqa anjam palontqajqa wau geregere poiym anjam palontoqnem. ³ A ya uge uyoqnsim nanarioqnaiq. A urur minjinj oqim qotoqnaiq. A lawo na soqnem. A silali koba ti sqajqa are qaloqnaiq. ⁴ A na aqa uŋga ti aqa aŋgro naŋgi ti geregere taqatnjqroqneme. Yim aqa aŋgro naŋgi aqa anjam geregere quoqnsib

dauryoqnebe. ⁵ A aqa segi uŋa ti aqa aŋgo naŋgi ti geregere taqatnjqasai di a Kristen naŋgi geregere taqatnjqasai keresai dego. Deqa a Kristen naŋgo gate sqa keresai. ⁶ Ni Kristen tamo bunuj a gate ataim. A gate sqas di a diqosim aqa segi ñam soqtim Qotei na nami Satan ɣolawotej dego kere a ɣolawotqas. ⁷ Deqa ni tamo bei a Kristen naŋgo gate atqa osimqa ni aqa kumbra endeqaji unsim a gate ate. A tamo ungasari Qotei qaliesai qaji naŋgo ɣamgalaq di ñam bole ti unu. A ñam bole ti sqasai di a gate ataim. Tamo deqaji a gate sqas di tamo qudei naŋgi a misilinyibqa Satan na a tulan ugeugeiyim a aliemq di sobulqas.

Kristen naŋgo wau tamo naŋgi areqalo bole ti sosib waŋoqnebe

⁸ Tamo qudei naŋgi Kristen naŋgo wau tamo sqa marsibqa naŋgi dego areqalo bole ti sosib kumbra bole bole yoqnebe. Naŋgi medabu aiyeltaib. Naŋgi ya uge uyoqnsib nanarioqnaib. Naŋgi tamo naŋgo silali yainjrqajqa are koba qalaib. ⁹ Naŋgi Qotei aqa ɣamgalaq di are gulbe saiqoji sosibqa uli anjam Qotei a nami babtej qaji di singila na ojoqnebe. Uli anjam di iga nami quisim Qotei qa gago areqalo singilatem. ¹⁰ O Timoti, ni na Kristen naŋgo wau tamo naŋgi geregere peleinjrime. Naŋgi wau bole yibqa ni di unsim naŋgi wau tamo ate. ¹¹ Naŋgo ɣauŋ naŋgi dego areqalo bole ti sosibqa kumbra bole bole yoqnsib naŋgo segi so geregere taqatosib wau kalil Qotei na naŋgi enjrej qaji di geregere ojoqnebe. Naŋgi yomu anjam maroqnaib. ¹² Kristen naŋgo wau tamo naŋgi uŋa aiyeltaib. Naŋgi uŋa qujai segi esoqneb. Sosibqa

naŋgo ɻauŋ naŋgi ti naŋgo aŋgro naŋgi ti geregere taqatnjroqnebe. ¹³ Kristen naŋgo wau tamo naŋgi wau bole yoqnqab di naŋgi ñam bole ti sosib naŋgo areqalo Kristus Yesus qa bole siŋgilatoqnqab. Deqa naŋgi Yesus aqa anjam mare mare laqajqa ulaqasai.

Qotei aqa kumbra nami uliesoqnej qaji di tulaŋ kobaquja

¹⁴ O Timoti, e inoq urur bosiy numqajqa are koba unu. Ariya e mati anjam endi neŋgreŋyosim inoq qariňyonum. ¹⁵ E inoq urur bqa keresaiamqa ni ijo anjam endi sisiyame. Osim kumbra bole kalil Qotei na Kristen naŋgi dauryqa areareteqnu qaji di ni geregere poimqas. Kristen naŋgo utru agiende. Naŋgi Qotei ɻambile so qaji aqa segi tamo uŋgasari unub. Naŋgi tal ai bul tigeloqnsib Qotei aqa anjam bole siŋgilateqnub. ¹⁶ Iga kalil med-abu qujaitoqnsim endegsi mareqnum, “Qotei aqa kumbra nami ulitesoqnej qaji di tulaŋ kobaquja.” Aqa kumbra agiende,

A segi tamo bulyonaqa tamo uŋgasari naŋgi a uno-qneb.

Aqa kumbra bole kalil Mondor Bole na babtosiq iga osorgej.

Lan aŋgro naŋgi dego a unoqneb.

Aqa wau tamo naŋgi sawa bei beiq giloqnsibqa aqa anjam mare mare laqnub.

Mandamq endi tamo uŋgasari naŋgi a qa naŋgo areqalo siŋgilateqnub.

Qotei na a olo osiq lan qureq osi oqnaqa a dia ñam kobaquja ej.

4*Gisanj tamo nañgi mondor bqab*

¹ Qotei aqa Mondor a anjam endegsi babtej. Diño bati jojomoqnimqa tamo ungasari gargekoba nañgi Yesus qa nañgo areqalo singilatqa uratoqnqab. Nañgi gisanj mondor ti mondor uge uge ti nañgo anjam quisib dauryoqnqab.

² Dauryoqnibqa gisanj tamo nañgi na nañgo areqalo tulan niñaqyetnribqa nañgi nañgo segi une poinjrqa keresaiinjrqas. ³ Gisanj tamo nañgi dena anjam uge endegsib tamo ungasari nañgi minjroqnqab, “Ninji unjataib. Ninji tamotaib. Ninji damu uyaib. Di getento kalil.” O Timoti, anjam di gisanj. Qotei na ingi ingi kalil atelenej deqa iga ingi ingi di oqa maroqnsim Qotei binjyoqnsim oqnqom. Iga Qotei aqa anjam bole qalieosim gago areqaloq di singilatejunum deqa iga ingi ingi di oqnqom. ⁴ Iga qalie, ingi ingi kalil Qotei na atej qaji di bole. Deqa iga ingi bei getentqasai. Iga Qotei binjyoqnsim ingi ingi kalil di oqnqom.

⁵ Ingı ingi di Qotei aqa segi ingi bole tıñtinj. Qotei a gago pailyo na ti aqa segi anjam na ti ingi ingi di boleteqnu.

Pol na Timoti minjej, “Ni Yesus aqa wau tamo bole soqne”

⁶ O Timoti, ni na ijo anjam kalil endi gago Kristen was nañgi minjroqne. Ni degyqam di ni Kristus Yesus aqa wau tamo bole sqam. Yimqa anjam bole ni ino areqaloq di singilateqnum qaji dena ti powo bole ni osim dauryeqnum qaji dena ti ni olo torei singilatmesqas. ⁷ Tamo qudei nañgi laña sa anjam uge uge mareqnub. Anjam dena

tamo ungasari nañgi nanaritnjreqnu. Deqa ni anjam di qoreiyosim Qotei aqa kumbra dauryqajqa sinjilaoqne. ⁸ Ni qalie, iga gago jejamu qaloqnsim geregere taqatoqnqom di iga sinjila oqnsim sqom. Kumbra dena iga kiñala aqaryaigwas. Di gago jejamu segi aqaryaiyqas. Ariya iga Qotei aqa kumbra dauryqajqa sinjilaoqnqom di iga mandamq endi so bole sosim mondonj dego iga ñambile gaigai sqom. Kumbra dena iga torei aqaryaigwas. ⁹ O Timoti, anjam di bole. Tamo kalil nañgi quisib marqab, “Bole.” ¹⁰ Qotei ñambile unu qaji a na tamo ungasari kalil nañgi eleñqajqa waueqnu. Od, a na tamo ungasari a qa nañgo areqalo sinjilateb qaji nañgi bole eleñej koboqo. Deqa iga Qotei qa tarinjoqnsim unum. Utru deqa iga gaigai sinjila na aqa wau ojeqnum.

¹¹ Ijo anjam kalil endi ni na plaltoqnsim Kristen nañgi minjroqne. ¹² O Timoti, tamo qudei nañgi ni qa mareqnub, ni añgro kiñala. Tamo nañgi dena ino ñam ugetetmaib. Ino anjam maro ti ino walwel ti di ni geregere taqatosim kumbra bole segi yoqne. Osim qalaqalaiyo kumbra dauryoqnsim Qotei qa ino areqalo sinjilatoqnsim Qotei aqa ñamgalaq di tamo bole une saiqoji soqne. Soqnim Kristen nañgi ino kumbra di unoqnsib ni daurmoqnqab. ¹³ Ariya e inoq urur bqasai di Kristen nañgi louqa korooqniqbqa ni tigeloqnsim Qotei aqa anjam neñgrenj di unu qaji di sisivoqnsim anjam aqa damu palontoqne. Osim nañgi Qotei aqa gam bole osornjroqne. ¹⁴ Nami Kristen gate nañgi ino gateq di nañgo banj atnabqa Qotei na ni sinjila emej. Bati di tamo bei na Qotei aqa

medabu osiq ni qa anjam bei babtej. Deqa ni singila di oqnsim Qotei aqa wau ojqa asgimaiq.
15 Ni gaigai wau di geregere taqatosim singila na waquoqne. Yimqa Kristen kalil naŋgi ino kumbra di unoqnsib maroqnqab, “Ni Qotei aqa wau bole yeqnum.” **16** Ni ino segi kumbra ti ino anjam maro ti geregere taqatosim singila na Qotei aqa wau yoqne. Yimqa Qotei na ni ti tamo uŋgasari kalil ino anjam queqnub qaji naŋgi ti elenqas.

5

Kristen kalil naŋgi gago was, jaja, ai abu bul unub

1 O Timoti, ni na tamo qeli naŋgi ɻiriŋtnjroqnaim. Ni lawo na naŋgi tingitnjroqne. Ni naŋgi tingitnjrqa osimqa naŋgi ino abu bul lawo na tingitnjroqne. Anqro meli naŋgi ti anqro wala naŋgi ti dego lawo na tingitnjroqne. Ni naŋgi tingitnjrqa osimqa naŋgi ino was bul lawo na tingitnjroqne.
2 Uŋja qeli naŋgi dego tingitnjrqa osimqa naŋgi ino ai bul lawo na tingitnjroqne. Uŋja meli naŋgi dego tingitnjrqa osimqa naŋgi ino jaja bul lawo na tingitnjroqne. Ni Qotei aqa ɻamgalaq di une saiqoji sosimqa uŋja meli naŋgi tingitnjroqne.

Uŋja qobul naŋgi taqatnjqajqa anjam

3 Nuŋgo ambleq di uŋja qobul naŋgi unub. Naŋgi qudei anqro saiqoji. Deqa ni na uŋja qobul naŋgi di kumbra bole osornjroqne. **4** Uŋja qobul qudei naŋgo anqro ti moma ti soqnib ni na naŋgi endegsi minjre, “Nuŋgo ai ti moma ti naŋgi qobulonub deqa ningi na naŋgi taqatnjqoqnsib ingi ingi enjroqniy. Nuŋgo wau bole agide. Niŋgi nami

aŋgro kiñilala sonabqa naŋgi waukobaoqnsib ningi gereinjgoqneb. Bini naŋgi qobulonub deqa ningi na kamba naŋgi taqatnjroqniy. Ningi kumbra degyqab di Qotei a ningi qa tulan areboleboleiyqas.”

5 Uŋa qobul qudei naŋgi aŋgro saiqoji. Naŋgi segi unub. Naŋgi Qotei qa naŋgo areqalo siŋgilatoqnsib a qa tariŋoqnsib qolo ti qanam ti pailyoqnsib unub.

6 Ariya naŋgi qudei naŋgo segi jejamu qa areqalo uge uge dauryeqnub. Deqa naŋgi moiybulejunub. **7** Deqa ni na uŋa qobul naŋgi di minjroqnimqa naŋgi Qotei pailyoqnsibqa kumbra bole bole dauryoqnebe. Naŋgi kumbra degyqab di naŋgi tamo ungasari kalil naŋgo ɻamgalaq di une saiqoji sqab. **8** Ariya ni que. Tamo bei na aqa segi tal qujai naŋgi gereinjrqasai di a kumbra tulan ugedamu yqo. A Yesus qa aqa areqalo siŋgilatqa uratobulqo. Ni une. Tamo naŋgi Qotei qaliesai qaji naŋgi kumbra uge deqaji yosaieqnub.

9 O Timoti, ni uŋa qobul naŋgo ɻam neŋgreŋyim Kristen naŋgi na iŋgi iŋgi qa aqaryainjroqñqab. Ni uŋa qobul endeqaji naŋgo ɻam neŋgreŋye. Naŋgi uŋa qeli wausau 60 onub. Naŋgi nami tamo qujai segi esoqneb. **10** Naŋgi wau bole bole yoqneb deqa naŋgi tamo ungasari naŋgo ɻamgalaq di uŋa bole-quja. Naŋgi na naŋgo aŋgro naŋgi gereinjroqnsib boletnjroqneb. Tamo lanjaj naŋgi naŋgo meq beq nabqa oqnsib gereinjroqneb. Naŋgi na Kristen naŋgo siŋga yansetnjroqneb. Tamo ungasari naŋgi gulbe ti sonabqa naŋgi na aqaryainjroqneb. Naŋgi wau bole bole yqajqa siŋilaqneb. O Timoti, ni uŋa qobul deqaji naŋgo ɻam neŋgreŋyim Kristen naŋgi na iŋgi iŋgi qa aqaryainjroqñqab.

¹¹ Ariya uña qobul meli nañgi singila bole unub deqa ni nañgo ñam neñgreñyaim. Nañgi qudei olo tamo oqajqa are prugnjreqnaqa Kristus qoreiye-qnub. ¹² Nañgi nami anjam singilatosib mareb, “Iga olo tamo oqasai. Iga Kristus aqa wau segi ojqom.” Ariya nañgo anjam di nañgi bunuqna uratosib olo tamo oqajqa are prugnjreqnu. Deqa nañgi unetonub. ¹³ Nañgo kumbra uge bei agiende. Nañgi lalie kobaeqnub. Di segi sai. Nañgi ta talq giloqnsib anjam laña laña maroqnsib yomu anjam quqwajqa tulaj arearetnjreqnu. Anjam uge uge iga marqajqa getento qaji di nañgi mare mare laqnub. ¹⁴ Deqa e are qalonum, uña qobul meli de-qaji nañgi olo tamo osib aŋgrotoqnsib nañgo segi tal gereyoqnnqab di kere. Nañgi degyqab di jeu tamo nañgi na Kristen nañgi misiliñjrqa keresai. ¹⁵ Ni qalie, uña qobul meli qudei nañgi Qotei aqa gam bole uratoqnsib olo Satan dauryeqnub. ¹⁶ Ariya Timoti, ni que. Uñgasari qudei Yesus qa nañgo areqalo singilateqnub qaji nañgo ai nañgi qobulonub. Deqa ni na nañgi minjrimqa nañgi nañgo ai nañgi taqatnjroqnsib inđgi inđgi enjroqnnqab. Yimqa Kristen nañgi na gulbe di qoboiyqasai. Uña qobul aŋgro saiqoji unub qaji nañgi segi Kristen nañgi na taqatnjroqnsib inđgi inđgi qa aqaryainjroqnnqab.

Kristen gate nañgi wau bole yeqnub deqa iga na nañgi gereinjroqnnqom

¹⁷ Kristen gate nañgi wau bole yeqnub deqa ni na tamo uñgasari nañgi minjrimqa nañgi Kristen gate nango ñam soqtetnjroqnsib inđgi inđgi qa aqaryainjroqnebe. Kristen gate qudei nañgi Qotei aqa anjam palontqajqa waukobaoqnsib Qotei aqa

gam bole tamo ungasari naŋgi osornjreqnub. Deqa ni na tamo ungasari naŋgi minjrimqa naŋgi Kristen gate naŋgi di tulaŋ geregereinjroqnebe. ¹⁸ Iga qalie, tamo naŋgi wauqab di naŋgo awai oqab. Agi Qotei aqa anjam bei nami endegsib neŋgreŋyeb unu, “Makau naŋgi waukobaoqnsib iŋgi ŋenŋgi paraparaiyoqnsib aqa sau taqal ateqnub. Deqa ningi na makau naŋgi damu uyqa saidnjraib.” ¹⁹ Ariya Timoti, tamo qujai na ni mermqas, “Kristen gate bei a une yqo.” Degsi mermqas di ni aqa anjam quetaim. Ariya tamo aiyel kiyo tamo qalub kiyo naŋgi na degsib mermibqa ni naŋgo anjam di quetnjre. ²⁰ Kristen gate qudei naŋgi une yoqnibqa ni na naŋgi joqsim Kristen gate kalil naŋgo ulatamuq di tigeltnjrsim naŋgo une boleq atsim ɻirinjtnjre. Yimqa Kristen gate kalil naŋgi ino kumbra di unsib naŋgi dego une yqajqa ulaqab.

Polna Timoti minjej, “Ni Qotei aqa wau geregere taqatime”

²¹ O Timoti, Qotei aqa laŋ aŋgro naŋgi ti Kristus Yesus ombla naŋgo ɻamgalaq di e singila na anjam endegsi ni mermqai. Wau kalil e ino baŋq di atem qaji di ni bole taqatosim waquoqne. Ni que. Ni ino len qujai naŋgi ti tamo ŋam ti naŋgi segi geregereinjroqnaim. Ni tamo kalil naŋgi turtnjrsim geregereinjroqname. ²² Ni tamo bei a Kristen naŋgo gate atqa osimqa ino baŋ aqa gateq di urur ataim. Ni grotqam di a bunuqna une yimqa ni a ombla une oqam. Deqa ni ino segi so geregere taqatosim Qotei aqa ɻamgalaq di une saiqoji soqne.

²³ Ariya Timoti, ni mene jaqatiŋmeqnu deqa ni bunuqna ya segi uyaim. Ni ya ti wain ti tutosim

uyoqne. Yim ino mene olo boleqas.

²⁴ Tamo qudei naŋgi une boleq di unu. Qotei na tamo naŋgi di awai uge enjrqas. Tamo qudei naŋgi une uliejunu. Bunuqna naŋgi une di dego boleq dgas. ²⁵ Dego kere tamo naŋgi kumbra bole qudei boleq di unu. Kumbra bole qudei boleq dosaiunu. Kumbra di dego boleq dgas. Kumbra di gaigai uliesqa kerasai.

6

Kaŋgal tamo naŋgi kumbra bole segi yoqnebe

¹ Ni na Kristen kaŋgal tamo naŋgi minjrimqa naŋgi naŋgo wau qa gate naŋgo ñam soqtoqnsib naŋgo sorgomq di geregere soqnebe. Yimqa wau qa gate naŋgi Qotei aqa ñam ti Yesus aqa anjam ti misiliŋyqa kerasai.

² Kristen kaŋgal tamo qudei naŋgi wau qa gate naŋgi dego Kristen. Deqa ni na kaŋgal tamo naŋgi di minjrimqa naŋgi endegsib are qalaib, “Gago wau qa gate naŋgi gago Kristen was. Deqa unŋum, iga naŋgo anjam gotraŋyoqnqom.” Naŋgi degsib are qalaib. Ni na naŋgi minjrimqa naŋgi endegsib are qalqab, “Gago wau qa gate naŋgi Yesus qa naŋgo areqalo siŋgilateqnub. Deqa iga naŋgi qalaqalainjroqnqom.” Naŋgi degsib are qalqab di naŋgi naŋgo wau qa gate naŋgi geregere wauetnjroqnqab. O Timoti, ni ijo anjam di plaltoqnsim Kristen naŋgi minjroqne.

Tamo naŋgi silali koba oqajqa are qalqab di Satan na naŋgi uneq breinjrqas

³ Gago Tamo Koba Yesus Kristus aqa anjam kalil bole. Di gisanj anjam sai. Iga anjam di

ojqom gam dena iga Qotei aqa kumbra geregere qalieosim dauryqom. Ariya tamo qudei nangi degyosaieqnub. Nangi Yesus aqa anjam di uratoqnsib olo anjam bei Yesus aqa anjam ti ombla kerekereosai qaji di palonteqnub. ⁴ Tamo deqaji nangi nango segi areqalo dauryqajqa tulan̄ arearetnjreqnaqa diqoqnsib laqnub. Nangi powo saiqoji sosibqa anjam qudei qa laŋa laŋa ɻirinjoqnsib ñam qudei qa anjam na qotoqnsib unub. Anjam dena nango are ugetetnjreqnaqa nangi qotoqnsibqa misiliŋ anjam koba maroqnsib areqalo uge ti laqnub. ⁵ Osib nangi gaigai ɻirin̄ anjam koba maroqnsib areqalo uge uge na niñaqoqnsib laqnub. Nangi Qotei aqa anjam bole poinjrosai bole sai. Deqa nangi endegsib are qaleqnub, “Iga Qotei aqa kumbra dauryqom gam dena iga ñoro koba ti sqom.” O Timoti, naŋgo anjam di gisan̄.

⁶ Bole, iga Qotei aqa kumbra dauryqom gam dena iga laŋ goge qaji ñoro koba oqom. Jejamu qa ingi ingi Qotei na egeqnu qaji di iga oqnsim mareqnum, “Ingi di iga qa kere.” Iga degsi mareqnum gam dena dego iga laŋ goge qaji ñoro bole oqom. ⁷ Iga qalie, iga nami ɻambabem di iga ingi ingi ti ɻambabosai. Bunuqna iga moiqom di iga ingi ingi ti olo moiqasai dego. ⁸ Deqa iga endegsi marqom, “Iga ingi uyo ti gara ti yala eqnum di kere.” ⁹ Ariya tamo nangi silali koba oqajqa are qaleqnub qaji nangi Satan na walawalainjroqnsiq uneq breinjreqnu. Aliem na wagme nangi ojeleñeqnu dego kere. Deqa nangi kumbra uge uge yqajqa are prugnjreqnaqa kumbra dena nangi tulan̄ uget-

njreqnu. Mondonj naŋgi torei padalqab. ¹⁰ Tamo deqaji naŋgi silali tulanq qalaqalaiyeqnub. Naŋgo kumbra di agi kumbra uge uge kalil qa utru. Kumbra dena tamo qudei naŋgi titnjreqnaqa naŋgi Yesus qa naŋgo areqalo sinjilateqnub gulbe gargekoba iteqnub.

Tamo uŋgasari Yesus qa naŋgo areqalo sinjilateqnub qaji naŋgi ɻambile bole oqab

¹¹ O Timoti, ni Qotei aqa tamo bole unum deqa ni kumbra uge kalil torei qoreiyosim taqal ate. Osim ni kumbra bole bole yoqnsim Qotei aqa kumbra dauryoqnsim a qa ino areqalo sinjilateqnub tamo uŋgasari naŋgi qalaqalainjroqne. Osim ni sinjila na tigeloqnsim gulbe kalil qobooyoqnsim tamo uŋgasari naŋgi lawo kumbra osornjroqne. ¹²⁻¹³ Tamo uŋgasari Yesus qa naŋgo areqalo sinjilateqnub qaji naŋgi sinjila na gurgurobuloqnsib bubunjeqnub. Deqa Timoti, ni sinjila na ururoqne. Osim dena ni ɻambile gaigai sqam. Nambile di Qotei na ni emqajqa are qalsiq metmej. Qotei a na qujai ingi ingi kalil ɻambile enjreqnu. Ni tamo uŋgasari gargekoba naŋgo ɻamgalaq di Kristus Yesus aqa ñam ubtoqnem. Deqa Yesus agi nami Pontius Pailat aqa ulatamuq di anjam maroqnej qaji aqa Abu Qotei wo naŋgo ɻamgalaq di e ni sinjila na endegsi mermqai. ¹⁴ Anjam ni quisim ojejunum qaji di ni geregere dauryoqne. Ni anjam di ugetaim. Ugetqasai di tamo naŋgi ni misiliŋmqa keresai. Ni anjam di dauryosim gilsim gilsim gago Tamo Koba Yesus Kristus a olo laj qureq na brantim ni unqam. ¹⁵ Yesus bqajqa batı di Qotei a

segi na bati atim a bqas. Gago are boletetgwajqa utru agi Qotei a segi. A segi qujai mandam ti ingi ingi kalil ti taqatejunu. A mandor kokba kalil nañgo Mandor Koba. A tamo kokba kalil nañgo Tamo Koba. ¹⁶ A segi qujai moiyo saieqnu. A suwañqoq di unu. Aqa suwañ di kobaquja. Deqa iga aqa areq di brantqa kerasai. Tamo bei na nami aqa ulatamu unosaioqnej. Tamo bei na a unqa kerasai. Deqa iga kalil gaigai aqa ñam soqtoqnqom. A bati gaigai siñgila koba ti sqas. Bole.

Ñoro tamo nañgi Qotei qa nañgo areqalo siñgilatoqnebe

¹⁷ O Timoti, ni na Kristen tamo uñgasari mandam qa ñoro koba ejunub qaji nañgi endegsim minjre, “Niñgi diqosib nunço segi ñam soqtaib. Nunço ñoro urur koboqas deqa niñgi ñoro qa are siñgilataib. Niñgi Qotei qa nunço areqalo siñgilatosib soqniy. Qotei na ingi bole bole kalil iga egeqnaqa iga oqnsim areboleboleigeqnu. ¹⁸ Deqa niñgi kumbra bole bole yoqnsib tamo uñgasari nañgi aqaryainjroqniy. Osib gaigai nunço ingi ingi jeiyoqnsib tamo uñgasari ingi ingi qa truqueqnub qaji nañgi enjroqniy. Mandam qa ñoro a ingi bole edegaib. Ingi bole agi tamo uñgasari aqaryainjrqajqa kumbra.” O Timoti, ni na tamo uñgasari mandam qa ñoro koba ejunub qaji nañgi degsim minjroqne. ¹⁹ Nañgi ino anjam di dauryqab di mondoñ nañgi lañ goge qaji ingi ingi tulañ koba koroiyib ingi ingi dena nañgi tulañ aqaryainjrqas. Yimqa nañgi ñambile bole gaigai sqab.

Polna Timoti minjej, “Ni Qotei aqa wau geregere taqatesoqne”

²⁰ O Timoti, Qotei na ni wau emej deqa ni wau di geregere taqatesoqne. Tamo qudei naŋgi anjam uge laŋa laŋa mareqnub deqa ni naŋgo anjam di qoreiye. Tamo naŋgi di mareqnub, “Iga powo bole ti unum.” Di gisanj. Naŋgi Qotei jeutoqnsib aqa areqalo dauryqa asginjreqnu. ²¹ Tamo deqaji naŋgi Yesus qoreiyoqnsib a qa naŋgo areqalo singilatqa urateqnub.

O ijo was, Qotei a niŋgi kalil qa are boleiyeme. Bole.

**Yesus Aqa Anjam Bole 2014
The New Testament in the Anjam language of Papua
New Guinea, 2014 revision
Nupela Testamen long tokples Anjam long Niugini,
2014**

copyright © 2014 Wycliffe Bible Translators, Inc.

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-04-28

PDF generated using Haiola and XeLaTeX on 11 Nov 2022 from source files dated 9 Oct 2020

0eb339dc-c20a-5065-9483-338933d97585